



**ATASSUT**

**UPA14/98-1**

**Gerhardt Petersen**

**28.05.2014**

**Nunatsinni umiarsuarni aqumiutut ilinniarsimasut suliffissaqarnikkut periarfissaat qanoq pitsaanerulersinneqarsinnaanersut qulaajarumallugu apeqquteqqaat aallaavigalugu oqallinnissamik siunnersuut.**

(Inatsisartunut ilaasortat Saxtorph Didriksen aamma Lars Mathæussen, Siumut)

Matumani Siumut sinnerlugit Inatsisartuni ilaasortat Saxtorph Didriksen aamma Lars Mathæussen-ip apeqquteqqaat aallaavigalugu oqallisissiaannut imatut ATASSUT-mit ilanngussaqaasaagut:

ATASSUT-mit oqallisissiamik siunnersuuteqartut, siunnersuumminni tunngavilersuutai paasilluarsinnaakutsoorpavut, taamaattorli aamma ATASSUT-mit isumaqarpugut kalaallit aqumiutut ilinniarsimasut umiartornermi sulisorineqarsinnaanerinit ajornartorsiutaasinnaasut aammalu sooq aqumiutut ilinniarsimasut ilinniakkaminnut atatillugu sulinniginersut erseqqarinnerusumik qulaajarneqartariaqartut.

Amerlasuunit naluneqarunangilaq imarsiornermik inuuniuteqarneq imaannaangitsuusoq, piffissami sivisuumik angerlarsimaffik qimallugu imarsiorluni suliffimmut tunniusimasuusariaqartarnerup kingunerisarpaa ilaqquttat piffissami annikinngitsumi qimaqqasariaqartarneri.

ATASSUT-mit tunngaviusumik isumaqarpugut inuup kiffaangissuseqarluni imminut ilaqquttaminnullu pilersuisinnaatitaanermut akisussaaffeqartoq, taamaattumik aamma naalakkersuinikkut sulinitinni pisariaqarsorivarput arlaatigut aalajangersaalinniginnermi isummernissamat tunngavigissaartariaqarnissaq.

Taamaattumik ATASSUT-mit isumaqarpugut pisariaqarluinnartoq erseqqissumik paasiniarneqartariaqartoq aammalu qulaajarneqartariaqartoq suut tunngaviunersut kalaallit aqumiutut ilinniarsimasut ilinniagartik tunngavigalugu inuutissarsiummik imaluunniit suliffimmik



ingerlatsinnginersut – allamik suliffeqarnersut imaluunniit suliffissaaleqisuunersut. Aammalu ilanngullugu paasiniarneqarlunilu qulaajarneqartariaqartoq aqumiutut ilinniarsimasut qanoq amerlatigisut ilinniagartik tunngavingalugu inuutissarsiummik imaluunniit suliffimmik ingerlatsinersut.

Tassunga tunngatillugu ATASSUT-mit pingaartilluinnarparput Kalaallit Nunaanni suliffeqarfiit aammalumi kattuffiit Kalaallit Nunaanni imarsiornermut attuumassuteqartut qanimut suleqatigilluinnarneqarnissaat, taakkunungami aamma soqutiginaateqanngitsoornaviannigilaq erseqqissumik paasissallugu pissutsit qanoq ittorpiaaneri, aammalu qanoq qanimut suleqatigiilluni aaqqiissutissanik suliniuteqarsinnaanissamik ingerlatsisoqarnissaanik – ullutsinnimi suliffeqarfiit pingaartillugu suleqataaffigisarpaat CSR - tassalu suliffeqarfiit inuiaqatigiinni akisussaaqataanerat.

CSR-mut tunngatillugu ATASSUT-mit eqqaasitsissutiginngitsoorsinnaanngilarput, inuiaqatigiinni suliffissaaleqineq ullumikkut annertooq atuummat, taamattumillu suliffeqarfissuarnut CSR-mik “erfalasumaartut” kaammattussavagut inuiaqatigiinni annertunerusumik akisussaaffimmik tiguseqqullugit, naluneqanngitsutuummi suliffeqarfissuit ataatsimut isigalugu ukiuni kingullerni angusarissaarluartarsimammata naatsorsuutitigut.

Taamatut inuiaqatigiinni kivitseqatigiilluni suliniuteqarsinnaaneq ATASSUT-mit aqqutissaalluarsorivarput, Naalakkersuinikkut qulangersimaarinninnani illuatungaani suleqatigiinnikkut akisussaaqatigiilluni tamanut pitsaanerpaamik aaqqiissutissaasinnaasunik suliniuteqarnissaq – taamaasiornikkummi suliniutinut piginneqatigiilluni akisussaaqatigiinnikkut aaqqiissutissat ataavannerusut ATASSUT-mit nassaarineqarsinnaasorinerugatsigit.

ATASSUT-miit miserratigissanngilarput aqumiut nunatsinneersut soorngunami salliutinneqarnissaat piumanerungaartuugatsigu, taakkumi nunatsinnut annertuumik nunatsinni napatitseqataapput, akileraarutigut, ilami nalinginnaasumik nunatta iluani aningaasat kaaviaartunut annertuumik ikorfartueqataallutik. Aqumiutut ilinniarsimasut qaffasinnerusumut atorfinnissamut imaluunniit angallammut aalajangersimasumut pappiaqqatigut piumasaaqatinut inuuppata, taava inuiaqatigiit annertunerusumik piumasuseqartariaqarpugut piumasaaqatinut angussisinnaanissatsinnut minnerunngitsumik taamatut angusaqarniartut ikorfartuissalluta.



## ATASSUT INATSIARTUNI

---

Taamatut apeqquteqaat aallaavingalugu oqallisissiamut ATASSUT-mit  
ilangussaqarpugut, Naalakkersuisullu akissuteqaataat aamma tusaatissatut tigullutigu.